

Date – 15/01/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Lirngching na tak thlen thulha chhanchhuah leh chhawmdawl hna kalpui dan tur, a taka enchhinna 'State Level Mock Exercise on Earthquake' chu vawiin khan state pumah neih a ni.
2. Chief Minister Pu Lalduhoma'n thalai te chu kuthnathawk turin a sawm.
3. Prime Minister Narendra Modia chuan mipui rorelna rama bung hrang pawimawh leh kalphung tha taka neihin mipui rorelna nghet leh tha thlen thei tih India-in a lantir a ti
4. Iran ramchhung buaina a zual zel avangin India chaun a mite Iran tlawh lo turin a hriattir.

<><><>

STATE LEVEL MOCK EXERCISE

Lirngching na tak thlen thulha chhanchhuah leh chhawmdawl hna kalpui dan tur, a taka enchhinna 'State Level Mock Exercise on Earthquake' chu National Disaster Management Authority leh Disaster Management & Rehabilitation Department bultumin Mizoram district tinah kalpui a ni.

SFX

Lirngching avangin Mizoram district hrang hranga hmun 36-ah inchim, kangmei chhuak leh chhian hrang hrang thlen theih dan lem chan a ni a. Heng hmunahte hian District Emergency Operation Centre-te, Incident Site Commander-te, Staging Area Management leh Relief Camp-a hmalaknate chu Video Conference kaltlangin vilpui a ni a.

NDMA Sr. Consultant Brig. (Retd) Ravinder Gurung an State Emergency Operation Centre atangin heng chetlaknate hi thlirpuiin Pu PC Lallawmsanga, IPS (Retd.), DM & R Principal Secretary hlui leh Pu Dominic Lalhmangaiha, DM & R Director hlui te chuan State Observer angin an telpui bawk a ni.

State Level Mock Exercise on Earthquake hi chawhma dar 10 atang khan tih chhinna hi kalpui tan a ni a. District tin a Quick Response Force-te, Fire & Emergency services -te, National Disaster Response Force, State Disaster Response Force, Assam leh Tripura atangin Central Industrial Security Force (CISF), Assam Rifles, Border Security Force (BSF), Medical team, tlawmngai pawl leh volunteer-te mawhphurhna ataka an kalpui dan enchhin a ni a. Lirngching vanga In chim, kangmei

chhuak, kawng ping, inbiakpawhna chhia thleng thei kara chhanchhuah leh chhawmdawl hna awmze nei taka kalpui dan tih chhinna ah hian Line Department hrang hrang, PHE, PWD, P&E, Transport Department, I&PR leh a dangte pawh an tel a. Hliam enkawlna hmun 'Relief Camp' te hi a hmunah NDMA leh DM&R hotute hian an tlawh bawka ni.

Khaw thim hnua chhanchhuah leh chhawmdawl hna kalpui kawngah harsatna a awm leh awm loh hriat a nih theih nan State Level Mock Exercise hi tlai dar 5 atangin kalpui leh a ni bawka.

<><><>

CM

Chief Minister Pu Lalduhoma an thalai te chu kuthnathawk turin a sawm.

Vawiin khan Chief Minister hian Aizawl Vanapa Hall-ah Farmers Training on Scientific Rubber Cultivation, Harvesting Techniques, Post-Harvest Handling and Pest Management chu a hawng a, thusawiin Pu Lalduhoma chuan, Mizoram chuan a thlai thar chhuah te hmangin ram dang mite hriat a hlawh chho mek a ti a, Rubber chu hun rei tak daih, a chingtu mai bakah an fate tana in rochun theih eizawna a nih avangin a tha tih a sawi.

(Byte: CM Lalduhoma)

Mizoram Rubber Society (MIRSO) buatsaih hun a hman puinaah Chief Minister Pu Lalduhoma chuan, Mizo te chu tun hma atanga kut hnathawk nasa ni mah se hriat hlawnha khawp thar chhuah a awm ngai meuh lo niin a sawi a, tunah chuan Sawhthing hmangin hriat a hlawh ta a, Sapthei pawhin hriat a hlawh chho tan tih sawiin, a dawttu chu Rubber ni thei turah an beisei tih a sawi a. Rubber chuan ramngaw a ti chereu ngawt lo a, ramngaw a siam bakah leilung luangral tur a vengin tuihna pawh ti pung thei tura ngaih a ni a ti a. Mizorama Rubber chin theihna tur hmun tha zau tak awm chu a chingtu lamin an la hnawhkhat zo lo hle niin a sawi bawka.

He hun hmanpuitu Land Resources, Soil & Water Conservation Minister Pu Lalthansanga pawhin thu sawiin sum an hmuh theih nan NABARD, SASCI leh Bana Kaih atangin an lakhawm a, kuthnathawk tuten an hlawntlin pui ngei theih nan theihtawp an chhuah tih a sawi bawka.

(Byte: Minister Lalthansanga)

MIRSO te hian Chief Minister Pu Lalduhoma, Minister Lalthansanga, Rubber Board Development Officer Chiranjib Banik, Pu B. Lalthazuala leh Chungklang Rubber Cluster te hnenah chawimawina an hlan nghal bawka.

Chawhnu lamah Rubber chingtuten an thlai chin dan chungchang leh hma an sawn theih dan turah training an nei a, hemi kawnga mi thiam ten zirtirna an pe a ni.

<><><>

RUANG PHURH ONLINE

Sorkarin ruang phurhna tur a ruahman chu awlsam zawka a mamawh ten an chhawr tangkai theih nan internet kaltlanga dawrna tur Ruang Phurh Online Portal vawiin khan Social Welfare Minister Pi Lalrinpuin a hawng.

Pi Lalrinpuii chuan ruang phurhna tura ruahmanna siam hi sorkarna an siam hma pawh a an lo ngaih pawimawh tawh manifesto a an neih tih hlawhtlinna a ni tih sawiin, ruang phurh scheme tuang taka hmasawn zawnga kalpui theih a ni ta chu lawmawm a ti a, MSeGS te nen tha taka an thawhho avanga lawmthu sawiin, portal hi hmang tangkai turin mi zawng zawng a sawm a, tihchangtlun zel a nih tur thu a sawi bawk.

Ruang phurh online portal hi google play leh app store atanga download theih niin, vawiin ni thlenga ruangphurhna application lut tawh zat hi 1680 a ni a, cheng nuai 175 sing 8 sang 5 pek chhuah tawh a ni.

Social Welfare department hotute atanga Akashvani News Aizawl thudawn danin, ruang phurhna senso sorkarin a tumsakna hi kum 2024 September thla khan hawn a ni a, hemi kum vek December thla atangin ruang phurh man hi pek tan a ni.

Mizoram sorkar chuan ruang phurhna senso tur hi kum 2024-25 leh 2025-26 atan budget-ah cheng nuai 500 ve ve a dah a; ruang phurh inkaihhraina in a tarlan danin, ruang phurh tur chu a thlenna tur km. 20 aia hnai a ni tur a ni lo a, km. 20 piah lamah chuan tu tan pawh hman theih niin, lirthei thlen theih chin a huam a ni.

Inkaihhraina ang chuan, ruang phurhna lirthei hman man chu State Transport Authority in rate a siam anga kalpui a ni a, ruang phurhna man sorkarin a peksak hian lirthei pakhat chiah a huam a, Ruang phurhna hlat zawng chhût nan ruang chhuahna atanga a dahna hmun inkar hlat zawng lâk tur a ni a; lirthei thlen lohna khua a nih chuan lirthei thlen theih tàwpna thleng a ni. Ruang phurhna chu kawng tawi thei ber hman tur a ni bawk.

<><><>

IMD FOUNDATION DAY

Meteorological Centre, Aizawl chuan vawiin khan India Meteorological Department din champhaphak vawi 151 na pualin Berawtlang, Aizawl ah hun an hmang a, IMD pawimawhna hrang hrang leh a hnathawh tarlanna atan hun hman a ni.

Vawiina hun hman hi Director General of Meteorology, Dr. Mrityunjay Mohapatra, leh Deputy Director General Dr. Sanjay O'Neill Shaw ten an tel pui a, Meteorological Centre, Aizawl Director Sudheer Kumar Dwivedi chuan khua leh tui tana IMD hnathawh hrang hrang tarlangin an hmalakna tura hmachhawp hrang hrang a sawi a, an hnathawh kawngah sawrkar thlawpna an hmu tha tih sawiin Mizoram khua leh tui te nena an thawhhona chu chhuanawm atih thu a sawi.

He hunah hian IMD pawimawhna hrang hrang leh a hnathawh tarlan niin khaw chinchang hrilh mai piah lamah huan thlai enkawl kawnga an hnathawh dan te tarlan a ni a, chhياتna thleng thei hmun hrang hranga hriatirna an pek thin chuan zawm a hlawh tha hle niin an sawi a ni.

Vawiina hun hmanah hian Ferrando English Medium School zirlai naupangte chu zirtirna hrang hrang pek an ni a, hun hlawk thlak tak hman a ni.

<><><>

SPORTS MINISTER

Sports Minister Pu Lalnghinglova Hmar chuan Mizote chu infiamna lamah sang viau tawh mah se, hmasawanna tur tam tak a la awm a ti.

Vawiin khan Minister hian a Pisa-ah FMSCI Indian National Championship 2025 neih zawh taka pahnihna Lalnunsanga lawmpuina hun a buatsaih a. Minister chuan Infiamna hmanga Mizoram leh Mizo ti hmingtha thei an awm chu lawmawm a tih thu sawiin, sorkar in budget a pek theih tam lo tak chung a Mizoram Motor Sports Association (MiMSA) hmalakna chu a chhuanawm hle a ni, a ti.

Pu Lalnghinglova Hmar chuan, infiamna huangah Mizo te thlen chin sang tawh hle mah se hmasawna tur a la tam tih a sawi a, mahni dinhmun dik tak inteh ngam a, mahni hmasawna lai tur hriat thiam chu a pawimawh tih sawiin, Mizoram chu India ram State dangte aia bul tan tlai deuh ni mah se nasa taka hmasawna a awm chu chhinchhiah tlak a nih thu a sawi bawk.

National Championships hi MRF leh Madras Motorsports Club tangdun in an buatsaih a ni a. Lalnunsanga hi Motul Sparks Racing team hminga inlan niin, Novice (Stock) Upto 165cc huangah pahnihna dinhmun a luah thei a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

LUF AWARDS

Lalthara te Unau Foundation (LUF) chuan vawiin khan Thilsiam Chhantu Chawimawina hun a vawi li nan an hmang a, .

Aijal Club-a hun hmanah hian, mi pahnih Pu Vanlalhrima, Mission Veng leh Johny Lalhrualtuanga, College Veng te LUF Award hlan an ni a, pawl pahnih - UPC NEI General PYD Environment Protection Committee leh Champhai Nature Conservancy te bakah khaw pahnih - Sailulak leh Sairep te hnenah Award an hlan bawk.

LUF Award hian chawimawina thuziak bakah pawisa fai cheng nuai khat a keng tel a, kum hmasa lam nena belh khawm chuan cheng nuai 22 an sem chhuak tling tawh a ni.

LUF President Pu Lalthara chuan Award bakah midang tana an luanchhuah tawhna zawng zawng chu cheng nuai 50 chuang a nih tawh thu a sawi. LUF hi 2023 khan din a ni a, leilung leh a chhunga awmte humhalh kawnga hna thawk thate an lo chawimawi tawh thin a ni.

<><><>

PM

Prime Minister Narendra Modia chuan mipui rorelna rama bung hrang pawimawh leh kalphung tha taka neihin mipui rorelna nghet leh tha thlen thei tih India-in a lantir a ti. Vawiina New Delhi-a Samvidhan-a buatsaih Conference of Speakers and Presiding Officers of the Commonwealth-ah he thu hi sawiin Pu

Modia chuan India chuan ramchhunga hnam leh ze hrang hrang awm chu democracy chakna a tan a hmang a ti a. India ramah chuan democracy chu mipui kilkhawr ber hnenah pawh thliarbikna awmloa rorelna tha pek anih thu a sawi a. Kum kalta chhung reilote ah khan ramchhunga mi rethei vaibelchhe 25 chu retheihna ata chhanchhuah an ni tawh tih a sawi a. Mipuite chu dah pawimawh hmasak ber an nih thu sawiin mipuite mamawh chu sawrkarin a ngai pawimawh hmasa ber thin a ti bawk.

<><><>

MEA ON IRAN

Iran ramchhung buaina a zual zel avangin India chaun a mite Iran tlawh lo turin a hriattir. Union Ministry of External Affairs chuan thuchhuah siamin Iran thil thleng mek thlirin India mite chu thu leh awm hma chu Iran-a zin lo turin a ngen a. India mi Irana khawsa mekte pawh fimkhur tur leh lungawilohna lantirna hmunte tlawh lo turin a chah a ni.

Iran ah hian sawrkar laka lungawilohna boruak a sosang zel a, venhimna dinhmun pawh a derthawng tawh hle nia thudawn a ni a. Hei vang hian sawrkar chuan Zirlai, sakhaw biakzina kal, sumdawng, khualzin leh India mi reng reng Iran-a la cham te chu a remchan dana chhuahsan vek tura thurawn pek an ni a. Nimin khan Iran Foreign Minister Aeyed Abbas Araghchi chuan External Affairs Minister Dr. S.Jaishankar chu phone in a rawn bia a. Pu Jaishankar-a sawidanin hruaitu pahnihte hian Iran boruak inmung chho mek leh a chhehvel an sawidun niin social media lamah a tarlang a ni. Hetihlai hian Iran-a Human righthst group te chuan rampum huapa sawrkar laka lungawilohna lantir anih hnuah mi 2600 chuang an thi tawh a. Iran mi tam takin ramri kanin Trukiye an lut tawh bawk a ni.

<><><>